



5»

Хор: Владимир Енов

Вуды нёхи лэщатты ялап сират



Хор: Департамент КМНС

Округеван стратегической сессия верса, вуды нёхи лэщатты ялап сират элты потар манас. Округ департамент, Роскачество, «ВНИИМП В.М. Горбатов нэмпи» ФГБНУ па округ районатан вуды нёхи элты лэтотат верты тахаятан рупитты ёх яха уйтантысат.

Уйтантапсая ветьяң хоят ёхтылдыс. Кат хатд със потар тусат, хоты ялап сирн вуды нёхи лэщатты па верам лэтотдал туңа сира верты мосал.

«Вуды нёхев садиката, ашкудаята, леккар хотата кит-да. Сишн нёхи лэ-тотат ялап стандарт сирн верман ат усат», – АПК ЯНАО

департамент куся даңкар нэ Любовь Охман ястас.

Ёхтам хоятат «Паюта» вуды нёхи элты верты лэтот хота яңх-сат, вантсат, хоты вуды эватда па муй тахая кашң нёхи шуп лэщатда. Экспертат па научной сотрудникат пидан уйтантысат. Муй ялап тахаята лэщатты нёхев китты питда па муй хорпи нэпекат си ураңан верты мосал, потар тусат.

«Ма ведси си рупата сирн рупитты питсам. Манэма сит ялап вер. Хоты нёхи лэщатда, муй лэтот верда. Си касасайн ма вантсам, хоты па хоятат рупитлат, рупатаед уятлат. Ма нумаслам, округ кусяйдыв

вуды тащ елды туты верат па улапса ураңан ар рупата вердат. Па регионатан симась нэтапса антом. Округеван манты рупатаев иты па шимлаң мир ёх тащдал хося ситы ат манал, вуды ёх улапсаев елды ат ул», – рут мир Вуды ёх Союз куся Михаил Яр ястас.

Округеван ветхосьяң вуды хорты таха па нядхосьяң вуды нёхи лэщатты хот рупитал. Хасям талан вуды нёхи элты 2400 тонна лэтот верман ус. 329 тонна полуфабрикат садиката, ашкудаята па леккар хотата китса.

Альбина Тырлина ханшам потар



Хор: «Дух Авт» архив

Ялап питты верат

Ун кер тылац олаңмет хатд вуш элты Россия ловатан пенсияйт 7,5 % элатдайт. Ши тумпийн мосты пормасат, портунат па лэтотат ай куртата тутдыты вер па ялап вантса.

Улты хотат па хоятата маты щиран, мосал нын хот пунданан улты хоятат элты нумасты, ант торастаты. Ун Ляля юкантам кев хорат туңа щиран вантман тайтыя па лэщаттыя питдайт. Улты хотатан вуна тыныты лапкайт рахтэд па мостэд щиран артадалайт.

Всероссийской олимпиада етшас

Хащам дапатан Новый Уренгой вошан Всероссийской олимпиада история щиран сохнас.

Мет ямшакат усат Кира Борякина па Матвей Ставкин Новый Уренгой гимназия элты. Щалта яртъяңмет классан уталтыты Константин Царёв Надым вош элты.

Кашң няврэм сот ветьяң щёрас ёша пайтас. Ямал губернатор Дмитрий Артюхов сертификатат мойдас Пулцават вош вантты ураңан.

Сама рахты па умац рупата

Там хатлатан нэпекат акатлайт, хой «Йиңкидор» нэмпи парк хоща охды рупитты ки кашащал.

Ущ тылащан «Полуйский» заказника яңхлат, хота кураңвой, нёхас, долмах Ямал Вурты нэпека доңалман улдат. Уйт дор па унт дор тылщатан овцебыкат хоща мандат.

Ин яң хатадан рупитты питлат. Пушасат вердат, куран яңхты ялап юшат талдат.

Альбина Тоярова ханшам потар

Вертолёт ялап юшат

Округев хуват тадан машинайт яңхты юшат рупитлат. Хоятата куртат кутан па Пулцавта кеншак яңхты. Ин камн хошма йиты питас, донсяд додал, ешауд йиңк нох эпатад, юшлад лап пентдайт. Луң унты хоятат куртат кутан туп вертолётан яңхты верытлат.

Ин Тарко-Сале вош элты ай куртата вертолётан яңхты ялап рейсат пуншсайт. Хоятат Самбург, Халясавэй, Толька па ёхды яңхты верытлат. Вертолёт тынал ун хоят ураңан хут сёрс солкувая хойл, катхосьяң тал унты улты няврэмат билет тынал – худам сёрс, кат тал унты улты ай няврэмат кеша ох сохаптаты ант мосал.

Альбина Тырлина ханшам потар

Мир верат

Хот лоңалан олты донц па еңк

Товия йиты порайн хот лоңалан олты донц па уна энмам овам еңк пулат шаңкап ил хатэмиты верытлат. Управляющий компанияйт, округ утхот кушайн ши вер вантман тайты партсайт.



Хор: Зоя Куртямова

Вошаң хоятат ант мушмалты па пормасат ант шукатты ураңан, лув ёшлалан тайты хотат хот лоңалдал донц элты ван кут сыстапаты. Ши кеша нэман уталтам хоятат улдат, хоятат хот лоңда эсалты рупата нэпек тайлат.

Шуштыйн, иса хун нохды вантла. Тухад хоятат машинайдал, ай няврэм коляскайт хот пуңда лоңалталдал. Вера ант питты ураңан, хурыман удаты, пормасдан хот пуңалан ад хаядан. Няврэмата па партартаты, шуштэдан вантман ат улдат. Юш хуват шушты па вольк.

Тумтака удаты па ад мушмалтыяты.

Зоя Куртямова
ханшам потар

Ар няврэм тайты хоттэлдата маты нётапса

Ар няврэм тайты хоттэлдат нётты ураңан, ялап тада ювам порайн, Хон мув куцаев утхот нэпек ханшас. Хоты партам верат елды манлат па нётапсайт хоятат унты ёхатлат, щит элты УрФО регионат кутан Хон мув Президент лаңкар ху Владимир Якушев Совет верас.

Федеральной округа доңам регионат кушайдал потар тусат, хоты шоши мувладан нётапса рупатаел манал. Муң округ куцаев Дмитрий Артюхов па щита ус.

Владимир Якушев ястас: «Ин Хон мув хуват маты нётапсайт йи хорпия вердайт. Нётапса маты порайн ныты ураңан, маты хоттэлд муй нётапса вул, маты отатан ант мада. Хоятата ястам ясңат каталты мосал па вера пайтты, маты нётапсайт хоятат унты ёхтапаты».

«Муң округеван, хащам яң тал сыс, ар няврэм тайты хоттэлдат нял пуш ара йисат. Няврэм сэма питты щиран муң ветмет местая этсув. Семьяята маты нётапсайт иса ялпитлдайт, елды олдайт па ялап отатан нётлдайт. Щиты вулы хотан яңхты хоятат «чумовой капитал» пормасатан мадайт. Няврэм сэма питты порайн «материнский капитал» ох сохаптада. Леккар хотан «Малышу Ямала» сох дараңан мойлаптадайт, кимет няврэм сэма питты порайн, сох лутты электронной сертификат ёша вулат. Муң округеван хулмет па елды сэма питты няврэм мет ара хойты «материнской капитал» сохаптада. Няврэмата тохдаң хопа юш нэпек луттыйн, тынал кат щёрас ветсот солкува унты шимла верман ул. Олаң



Хор: Зоя Куртямова

классатан уталтыты няврэмат ашкулдайн тын ант сохаптаман лапатлдайт. Кашаң няврэмат хут тал унты, охлы портунан ханшлдалдайт.

Хон мув куцаев партам щиран, Ас нопатты тыдац олаңмет хатл элты холна каматса ялап нётапса рупитты питал. Щиты нови тут, йиңк, па хот сохаптаты ох элты хольмаң процент компенсацияйн ёхды сохаптаты питла. Щёхар тыдац олаңмет хатл унты, ар нэврэмаң хоттэлдат уталтыты няврэмдал, ашкулдая па физкультурая думатты сох лутты ураңан, ветхощъяң щё-

рас солкува охан нётлдайт. Ашкулдайн па хольмаң педа хулам тал унты рупата педа уталтыты няврэмата, ун вошат кутан па вош дышийн яңхты автобусатан тын сохаптаты ант мосты питал», – округ куцаев Дмитрий Артюхов ястас.

Шоши мувеван арсыр хоятата нётапса охат сохаптаты ураңан «Мурах» карта верман ул. Хоттэлдат улапса шавиты вер педа нийлхус НКО, родовой общинайт па па хорпи похла рупитты хоятат рупитлат.

Зоя Куртямова ханшам потар

Вулэң ёх улапса элты потар манас



Хор: Марина Яр

Хащам лапатан Тазовской районан нялхощъяң регион элты мохет актащисат. Потар тусат, хоты там хатлатан вулэң ёх улдат па муй хорпи нётопсаятан мийлдыдайт.

Хащам ятан кушайт кашң пуш вулэң ёх пилан уйтантылат, потрэмилат. Щит элты елды ныда, муй верат туңматты мослат. Овс мув шимлаң мир хоятат департамент куца нэ Ульяна Каленюк каматса ясаң щит элты ястас: «Хащам талдан па ялап тада питам вуш элты муң 73 уйтантопса

верыдысув, 18 пуш касдыты хоятат хоша яңхсув. 2,5 щёрас молтас хоят потрэматы ёхтылдыс».

Ай куртатан, нюрматан улты хоятат ин там йисан верытлат социальной сеть хуват ясаң верты. 2022-мет талдан ялап дорожной карта постаман уса. Щита арадал верты нётопсайт ханшман улдат. Кашң хоятта, хой тащан муй нопталман яңхал, лув куртаң утхотала яңхты верытал, нэпекдал лэщатты нётопса ёша паятты ураңан.

Алина Тоярова ханшам потар

Айкедат

Округеван ай кер тыдась элты вулэт сибирской язва муш элты портунан понты питсайт. Ин рупатайт Ямальской, Приуральской, Тазовской, Надымской па Пуровской районатан манлат. Там хатла ветьяң педа кат сёрс вуды портунаң уколан версайт.



Вулэт муш элты портунан пондайт

Там талдан 545 сёрс вуды уколан понты утсидайт. Укол понты тумпийн, вулэт холдна вурэд уда. Тащан улты ампат иси уколан пондайт па порты войт элты портунан нёсытдайт. Си рупата ураңан вуды тащан яңхты хоятата ох сохаптаты ант мосал.

Мосты порайн симась рупатайт манты тахая кашң тад аршак вуды тутдыты питса. Хасям талдан 539 сёрс вуды уколан версайт па FRID-посан понты питсайт. Симась пормас хуват рупата сорашак манал.

Товийн вуды тащат кур-

тат пуңалан уллат. Си порайн колледжан ветеринара уталтыты няврэмат практика маты верытлат. Энамты няврэмат вуды тасян яңхты хоятата коралят донсыты нётлат, мосты нэпекат дэсятлат, войт посан па портунан пондат.

ГБУ «Окружной центр ветеринарии» Лорвош отделан вуды леккара рупитты пох Вячеслав Сандрин каматса ясаң ястас: «Ай кер тыдась хасям хатлатан муң МСП «Мужевский» совхоз педа луңтасты нялмет бригадайн рупитсув. Совхоз па шоши ёх

таща луңтасты кат сёрс вуды портунан понтсув па биркайн версув. Ешауд суюват омасты порая йил. Сишан рупатаев туп уц тыдасян яңмет хатл элты хольмаң хатл унты тулэв, кимет, худмет па ветмет бригадаята яңхлув, вертолётан тулдаюв.

Олаң хота Лапатнаңк вош элты карты юш хуват яңхты хопан манлув. Си бригадайт МСП «Мужевский» совхоза луңтаслат. Муң хулам ху рупитлув. Итал портун понал, кимет – бирка верал, худмет – нэпекат дэсятал. Си порайн холдна «Горковской»

Хор: Вячеслав Сандрин

совхоза луңтасты олаңмет, кимет, худмет па нялмет тащатан рупитты питлув.

Альбина Тырлина ханшам потар

Луңан сютсяты тахаята ханшлтыты пора ёхтас

Округ няврэмат луңан сютсяты тахаята ханшлтыты пора ёхтас. ЯНАОтдых портала заявкяйт китты мосал. Там луңан хут сёрс молтас няврэм лапат тал элты нийлхус тал унты Краснодарской край па Тюменской областан сютсяты питлат.

Одна льготной категория луңтасты няврэмат ханшлтадайт. Си юпийн, хой няврэмал сютсяты китты утсийл, ханшлтыты верытал. Кашң куртаң хоятата ханшам сёсан нэпеклад китты мослат.

Малоимущий семьяйт па няврэмат, хой аңкилал-асилад ин ляль манты тахаятан уллат, округ бюджет элты сютсясапсайед иса сохаптада. Си няврэмат тал йи пуш туп охды сютсяты верытлат.

Там луңан няврэмат лапат сютсяты таха пирыты верытлат. Хулам Тюменской областан – «Олимпийской ребячка», «Ребьячья республика» па «Энергетик». Нял сютсяты таха Краснодарской муван дэсятса: «Юбилейный», «Эллада», «Смена» па «Остров Мадагаскар». «Смена» лагерян нял смена рупитты питал.

Там луңан мийм путёвкайт охан сохаптаты ант мослат. Аңкет-асет туп манты юшел, леккар па страховка охед сохаптадат. «Смена» хоца манты няврэмат иса охды щутщадат.

Муй хорпи нэпекат китты па хоты ханшлтыты мосал, <https://leto.ru/> сайтан уятты рахал па телефон хуват: +7 (912) 071-50-37, +7 (912) 071-50-39 инсясты.

Альбина Тырлина ханшам потар

Хор: Альбина Тырлина



Шоши мир хоятлүв

50 тада ювам ики хул велпаслаты верн ой уйтас

Йистэдн Ас пуңалн улты хантэт хул велпасламан улдат. Щата мет сыры хул артелят тыйсат. 1898-мет талн Лорвош мувн купец ху М. Плотников Питлор куртан хул консервайт верты питас. Щалта Купеват куртан хул комбинат тыйс – щитат елды «Горковской» нәмпи хул завода йис, щит лышат энамты тылац 12-мет хатлан 1930-мет талн Горки (ханты щирн Ялап вош) вошн верса.

Артемий Гудков – олаңмет куца ус. Волаң Отечественной Ляль порайн хул велпаслаты ёх мет ар хул масат. 1941-мет талн – 17 960 центнер, 1942-мет талн – 33 082 центнер, 1943-мет талн – 36 646 центнер, щиты 1951-мет тал унты ус. Щи порайн куца ус Фёдор Дрожжин ус.

«Горковской» тахайн ар тал Илья куртаң Шульгин рут икет рупитлат: Семён Степанович Шульгин – лув похл Алексей Семёнович Шульгин («Лорвош район почётной ханнэху» нәм тайс) – лув похл Николай Алексеевич Шульгин – ин 30 молтас тал Асоваң хул тахайн лув похл Станислав Николаевич Шульгин велпаслад.

Станислав – ма яем, щипн ма яма уйтдам, муй щирн лув айтэдн энмас па хул па вой велпаслаты вера уталтыяс. Лув ай порайн алаңа нох килас, ащел пилн холпат вантты яңхас, щитат Ай Ас послат хоца омассат. Туп хатл кутоп порайн кердысқан. Щи томпи Илья курт пуңалн Няр хул посл хоца ищи лув холпел омсас, щит лув ай хопн вантты яңхас. Иса порайн ащеда моторат, холпат ялпатты нётас. Щиты айтэдн опращел па ащел элды хул па вой велпаслаты уталтас. Елды атэлт холпат омасты па мотор хопн вантты яңхты питас. Нумлэм, Станислав па

Игорь яйңалам холна, мосаң, 15 тал ловат усқан, туп щашев дын элтэнан потартас: «Лын щи юраң икеңана йисқан, ун ху хоятңан иты хул велдаңан, щипн дынана аршак лэтот понты мосл».

Ашкулайн уталтымалн Станислав номса ёхтас – елды Шульгин рутэл вер туты пилт. Щиты 30 молтас тал Станислав Шульгин Асов хул велты тахайн мет ям рыбақ, кашң пуш план тарматтал. «Ёхи хаңам тадатн ай йиңк ус, щипн план ая верса, тунял тал сыс ма 17 тонна арат хул масам», – яем ястад.

Шульгин рут велпас тахайт Илья курт пуңалн улдат, щит Асов курт элды 30 верста хуватыйн ул. Илья курт – щит Лорвош район мув кималн ул. Тата лув Игорь яем пилн ул, ялап хотңан, певалтхот па па мосты хотат омассаңан. Там рут куртэвн ияха уйтантылүв, ар рутлүв Асов куртан, итухл хоятат па вошатн улдат. Тата муң хул велпаслаты, воньщамотат акатты яңхлүв, щутщалув.

Станислав Марина Ивановна (эви опращнэмл Муркина ус) имел пилн вет няврэм энмалтсаңан. Мет ай эвел сэма питам вер элды щиты нумлалды: «И пуш ма ид воямсайм па аньтем Валентина Прокопьевна (эви опращнэмл Талигина) удмисэм. Нох килсам па имохты нумасам, эвема лув нэмл малэм, щипн Валентина нэмн масэм».

Туп лув семьяела шук ёхтас – ялап коронавирус муш элды имел антома йис. Ун няврэмлад уна йисат – елды уталтылат па рупитлат, щипн Станислав утца эвел энмалтал, опилалн нётла. Станислав па Валюша ай эвел педа шеңк умащ вантты – дын кутэнан нявлага потартлаңан, лув ай эвел шеңк самаңа тайлады, Валюша ащела нётл, лув пилдн хопн муй

«Б у р а н» хты мосман ухадн яң тайл.

Ям арат тал ёхлы Асов куртаң ялап Озёрной нәмпи курт хулуйн Станислав Николаевич ялап хотн маса. Ин хот лыпийн иса мосты отат верас, хот пуңалн мосты хотат омасл, луңан опилал огород хоца арсыр овощат омаслат.

Станислав сэма

питам хатлада, ропхаң курк тылац 5-мет хатла, рутлүв, лухаслад актащсат, лув лувела ар хошам ясат ястасат. Ма ищи яема ястадам, лудн лув елды мир педа самаң ханнэхуя ат ул, опращев вер елды тувман ям арат хул па вой ат велпаслад па хув йис нупат ойца-щуняңа, тумтака ат ул!



Финно-угор мир ёх

Улопсайл ар щирн ус



Манам сусн Суматвош район шоши мират хотъятн йисаңа-нуптаңа ювам ханты нэ Зоя Захаровна Сидорова (Юмина) пилн уйтанысам па портартам. Ванта, ёхи хашам порайн лув кашң пуш тый ёхтыдыл, ёнтасл па сырсыр ёш рупатайт лэщатл.

ТАЩАН ЯНХАМ ХОТГЭЛ ХОЯТАТ ХОЩА СЭМА ПИТАС

Мосл ястаты, хоты Зоя Захаровна ропхаң курк тыдац лапатмет хатадн 1942-мет талдн, Волаң Ляль порайн, Суматнёл куртэл пуңалн вулы тащатн янхам хотгэл хоятат хоща там нови туром илпия ёхтас. Юхат аңкел-ащел вулы тащ хоща рупитты верэл хайсаңан. Ащел колхозн худ па вой ведпаслатыя питас, аңкел сырсыр хотаң рупатайт верас па няврэмдал ёдн энмалтас. Щи вушат элты семьяед Суматнёл куртан Суматвош районан елды улты-холты питас.

ПОДНАВАТ ВОЩАҢ КУТОП АШКУДА-ИНТЕРНАТ ХОТА ТУСА

Щиканца 1950-мет талдн Зоя нийл тал довата йис па ащелн Поднават вошаң кутоп ашкуда-интернат хота ай хопалн елды уталтатыя туса. Ям хув дын щи йисн ай хопн Ас хуватн мантсаңан. Щи порайн ханты эвие нэш и руц ясаң ант па уйтас. Юхат велци интернатн улты па ашкудая янхты щирн ямсыева елды уталтасайт па руц ясаң оша пайттыя питас. Кашң айшак муй уншак вер ашкудайн там эвиева иса умащ ус. Щи ураңан Зоя шеңк самаңа па яма уталтыйс. Щиты лув 1961-мет тал товийн Поднават вошаң кутоп ашкуда хот ямсыева етшаптасды.

УН ЛЕККАР НЭҢАТА УТАЛТАТЫ МАНТЫ

Ашкуда етшамал юпийн, пилнэңал пилн, кат эви, номас версаңан ун леккар нэңата Омск вош медицинской институтта елды уталтаты манти.

Луң тылщат, ванта, ищи курамн сохантсат па сусн Зоя пилнэңал пилн ияха Омск воша лэщатытыя питсаңан. Суматнёл куртаң хоятат араттэлдн лувел 70 арат шойт ох ияха акатсат, щи онтасн Зоя ун воша щи ёхтас. Ванта, ляль манам юпийн ар хатнэху шеңк нушая усат па тухал хоятат иса ох ант тайсат.



Омской государственной медицинской институт кушайт кат ханты эвеңан кутоп ашкуда етшаптам нэпекқан яма арталасат па экзаменат таклы «врач-педиатр» щирн щий уталтатыя вусайңан. Тал молтас Зоя кашң уталтаты верал ямсыева версалды. Щи ураңан ун кушайдалн «хирургия» нэмпи тахая елды уталтатыя лув ханшлтаса. Щимащ волаң вера ханты эвие шеңк хувн лаңхас па ин туп ал нох амтас.

АПЩЕЛ МУШ ВЕРН ЁХАТСА

Имолтыйн Суматнёл куртал элты айкел ёхтас, хоты лув нэ ащел муш верн ёхатса. Зоя академической отпуск вус па ёхи манас. Щиты лув ащел Ёмвоша тусды, хота леккаратн арталаса па муш вердал холыева ямалтсайт. Юхат щи нэңал улты-холты щират улопсайл хуватн елды шеңк яма тыйсат. Щи вер юпийн Зоя кимет тал елды уталтатыя питас. Еша улды ёлта па кимет щимащ айкел ёхтас, хоты лув ащел шеңк вевтам мушн ёхатса. Щиканца Зоя кушайт элты па академической отпуск вохас, Суматнёла ёхтас. Щалта мушаң ащел тал порайн доваң ухаңн Суматвош районаң больница хот вуш унты тусды.

Ащел, ванта-са, нэмолты порайн леккарат хоща ант па ус, шеңк ант лаңхас щий питтыя. Зоя лувел больница хотн хайсалды па рут ёхдал хоща манас, хота лув щутьщатыя ил волыйс. Щи тахайн ултал кутн лув ал давласас, хоты ащел муш верат ямсыева лекцитдайт. Суматвошн Зоя ийикел пилн уйтантас, ванта, щи порайн лув нефтебаза хоща рупитас. Ащел па тыдац сыс леккар хотн ус па ищипа леккарата ант па эсдас лув мушаң тахайл эватты.

Щиталн лув иса ёхи вураттыя питас. Щалта Зоя эвелдн Суматнёл куртала ёхды пела щи доваң ухдалн айлтыева туса.

СУМАТВОША ЁХТАС ПА ИКИ ВЕРАС

Юхат Зоя Суматвоша ёхтас па ики верас. Щалта ийикелн ун леккара уталтатыя елды ант па эсалса. Еша улды семьяед хоща олаң эвел сэма питас. Щиты ин ултэл кутн лув Омской государственной медицинской институт элты айкелан ёхатла, хота ханшман ус, муй щирн лув щи тахайл элты елды Тюмень вошаң медицинской институтн уталтатыя верытл. Зоя нэмолты тахая елды уталтаты ант па манас. Дын икисакнаң кат эви тайсаңан па энмалтсаңан. Зоя айлтые лувела рупата каншас па еша улды хотхарат лэхиттыя Суматвош районал худ вуты тахаел хоща питас. Щалта консервайт лэщаттыя хотъятн рупатайн маса па щи тахайл элты нормировщик нэ щирн рупиттыя питас. Щиканца щикунш лув Тупалвош худ техникум хоща бухгалтер нэңа елды уталтатыя вутцийс па ант верытас. Ищи порайн мет олаңан аңкел Суматнёлн антома йис па еша юхат – худ ведпаслаты порайн ийикел йиңка питас. Щиты лув и пуша утца хашас па эвеңалал иса атэлт щиралн щи энмалтсалды. Юхат бухгалтер нэңа ищипа уталтыйс па хулам тал сыс Суматвош худ вуты тахайн рупитас.

Тамхатл Зоя Захаровна иса шоши мират верантты хота янхал. Щи тахайн лув арсыр ханты нэ луматты сохат ёнттыя утлас. «Манэма ин тый янхтыя, тата рупиттыя кашаң п у ш шеңк ям па умащ», – щиты лув муңева ястас.



Хор: Владимир Енов

Касдыман яңхты ёх

Округ хуват вуды ёх емаң хатлат холна мандат. Кашң вошан манты уй-тантопсаята ар касдыман яңхты энамты ёх ёхтыдыл. Си няврэмат ханты улапсаев елды тулат. Хоты лув тащан яңхлат па манты емаң хатлатан касасаятан каслат, там лопасан потрэм тулэм.

НАДЫМ ВОША КАСТЫ ЯҢХАС

Надым вошан манам вуды ёх емаң хатла Лорвош район «Кочевая семья» касасая Лонгортоват хоттэд хоятат Овкурт элты ёхтыдысат. Лув холд касдыман яңхлат. Сит элты Эдуард Эдуардович Лонгортов каматса ясаң ястас: «Ма опидам, яйңадам, ай куртаң мохидам пидан касдыдам, яртъяңмет тащан, Щаня ёхан шанш пелакан яңхдам. Муң хут ху рупитлуд. Ун кер тыдасы хасям хатлатан луң тахайлува касаллуд. Ёхды пела па Ас потты тыдасын. Ёи юшев сот нийлъяң километра кеман ул.

Надым воша ма нийлмет пуш ёхтыдыдам. Емаң хатлатан манты касасаятан муң туп дохан хухатлудува па тынсың ёваллуд. Тата нэмолты порайн нох ант питыдысам».



Хор: Альбина Тырлина

ВЕТМЕТ ТАЦАН РУПИТТЫ ПОХ

Максим Талигин ветмет тащан рупитал. Лув па каматса ясаң верас: «Катра порайн сит хутмет тащ ус. Худмет тац яха лыдатлайт. Ёхан кат пелак сахат ёш пелак сахат касдыман яңхлуд. Ма опем пидан касдыдам. Муң хосяев кат хот дойл, нял семья яңхал.

Мужи вош пуңадан вуды нехи маты таха ул. Кашң бригада катсот вуды мийдыл. Вет бригада – сёрс вуды мал. Оңатлуд муң тынылуд. Молты порайн совхоз кусайлуд ёхтыдылат, лувилала маллуд. Ар пелак Пулңавта тулуд. Сита тынаңшак вуйдылайт, аршак ох шитты верытда. Сита па негапса.

Вуды ёх емаң хатлат манты юпийн Кева касаллуд. Муң Кев лыпийн омаслуд. Хотэв луң хуват сита дойл. Яем Кев тум пелакан ул. Сусан елды Кев тум пелка касаллуд, Саран мув пела. Катлэм тыдасы сита уллуд. Силта па ёхды иултыя касаллуд. Кутан па хойлдылуд, хой тахайн катлэм лапат дойлуд. Хоты вудылуд мандат, си кеман муң касаллуд. Вудылуд хува питлат, муң па касаллуд. Кев тум пелак элты тыдасы кем манлуд. Муң районэв элты муң мет хув касаллуд. Юшев катсот ветъяң молтас километрая йил. Муң хоты ротая, вудылуд лапатман тулуд. Хойтэт па воштыман ипуша тулдал.

Надым воша ма худмет пуш ёхтыдыдам. Тата ар пелак касты хоятат каслат, вуды тащан яңхты ёх нох ант питыдыл. Муң тащан яңхлуд, касасая лэсатыты кум ант тайлуд. Сисан Надым воша хасям тал элты Лорвош район командая касты хоятат вуты питсайт».



Хор: Альбина Тырлина

Тащан яңхты энамты няврэмлуд ханты улапсаев елды тулат

ОПРАСЕМ ВЕР ЕЛДЫ ТУЦЭМ

Пулңават вош емаң хатлатан ханты няврэмат кутан Алексей Пугурчин Овкурт элты касасаятан касас. Касас элты ястас: «Ма Пулңават вошан колледжан вой леккара худмет курсан уталтыдам. Аңкем-асем вуды тащан олаң бригадин яңхлат. Аңкем яйдал пидан касдылат. Ма па тащан яңхты питдам. Опрасем, асем туты улапса елды тулам.

Симась касасаятан Пулңават вошан олаң пуш кассам. Тынсың сува ёвалсам, хулам пуш навармисам, катдантиман юрасьсам. Нэмолты та-

хая ант этсам. Мужи воша па касты яңхсам. Си тумпийн «Россия-1» каналан корреспондента усам. Емаң хатл элты потар тусам».



Хор: Альбина Тырлина

Эдуард, Максим па Алексей лув рут муведан, Лорвош районан, там мосванан манам вуды ёх емаң хаталан касасаятан кассат. Эдик па Максим хота кимет, хота худмет тахая этлыстан. Эдуард пертысыман олаң тахая этас, лонцхоп шитас. Этнобиатлон касасайн Эдуард па Максим йи командин усан. Сита па олаң местая этсаңан. Кашң нох питама касасайн нэпекан юкатсайңан па охан масайңан.

Алексей па Эдуард сита хулам пуш навармиман, яха олаң тахая этсаңан. Холна вулэң ухадан навралтыйс. Хольмаң касты хоят кутан ветмет тахая этас.

Ма ястаты утсидам, симась тахаятан вуды тащан яңхты хоятат тал йи пуш туп яха уйтантылат. Касасаятан лувилала си касты мосал, охат, мойлапсайт шитты. Елды пела тумтака ат улдат, ханты улапсаев елды ат тулат, касасаятан нох ат питыдылат.

Тус ясаң – тус потар

Катра порайна ики имел пилна осқан, няврем ант тайсақан. Ёхат ики лавал: «Ма том па тащат педа яңхдам-са». Ики масаң касли питман яңхал, масаң мала мутра номсална таял.

Щи актащас: ёсна ики кат кадаң йирас, па лув ампад вус. Тащан ики ант ос, щитна идампа кат кадаң йирас. Ат ол, лэдамтас ики па манас. Имел ялан хыщас, па лавал: «Па пурац ики мала мутра таял номсална?»

Ёхтас ики тащан нэңхэт хоца па юхи лоңас. Сай енцта аматтаса па инщасла: «Наң мала ораңна ёхатсан?» Ики лавал: «Ма холлисем наң кадаңдан ямат, наң эвалтэн катлэм кадаң вахта вутщисам. Масаң наң манэм тынылдан?» Том ики лавал: Наң малайи нядмилан. Манэм нядмита вутщилан, нэмоса наң ант тайлан. Малайна лотлэн кадаң? Манэм лэпалта дьггтад лампа там сала ики? Ким ласкадан па хоц сэңкадан!» Ики лахы ким ласкаса па хоц сэңкса. Щиты такан сэңкса-па, нэхта ант веритас, хоц патса. Лув пилэдна ювам ампиел йис па вантладды: ярал халмал. Вусды-па нох дьсды. Амп, ярал дьвмал юпина, щита лайты ор хатат вусды-па холам пус еңитсалды, па юхи нэхамтас.

Юхы йис па имина инщасла: «Яран хата хый-

сэн?» Ампие сытаман манас па сунна ил хояс. Щи юпина ахтасыта питас, имоса порайна мала путы няңхал уңдал эвалт ким этас, щи юпина сэмат ким ахтас. Имоса порайна щи няңхал эвалт нэңху этта питас. Щи эвалт ики олмал, ампиелна юхы туса па йилпитса. Ики нох лаяс па лавал имел элты: «Ма па мандам». Ими лавал: «Па хол манлан, асды питсан мала, па велдай!» Ики соматлияс, кат кадаң кирас, па манас. Ищиты ампиел вус-па, лэдамтас. Итта топ па хатат педа манас. Тохы ёхтас па юхи лоңас, сайна енцтаса. Па ищиты инщисла: «Ики, наң па мала ораңна ёхатсан?» Ики лавал: «Ма холлисэм: наң кадаңдан ямат. Щитна ма наң эвалтэн катлэм кадаң лотта вутщилдам». Па ики лавал: «Наң ики, манэмна наң нэмоса ант тайлан. Малайна наң ма эвалттэм кадаң лотта вутщилан?»

Тащан

Вураяң ики па мутраяң ампие

ики хоц ликащас па лавал: «Наң манэмна манэм нядмитта вутщилэн». Йиклад элты лавал: «Там нядмиты ики ким талалн па хоц сэңкадан!»

Ики лахы ким талса па хоц сэңкса. Щита хойтад эвалт хоц патса, па щита щи халас. Ампиел йис па ярал юхы дьсды. Па ищиты щита лаям ор хатат холам пус най парта еңитсалды, щитлна юхы нэхамтас.

Юхы ёхтас па сунна ил хояс. Еса хояс

па ампие ахтасыта питас. Ими номасл: «Ампием па мала атам ат дьс? Йийкем хол таңха манас?» Имоса порайна ампие мала путы няңхал щи ким ахтас. Щи юпина па нэңху сэмат, щи сэмдан холна па нэхлат. Щи няңхал эвалт нэңху этта питас, ёхат щит ики олмал.

Ики лавал: «Па хоц велдем. Ампием антам ос ки, щита щи халсам, идампа». Ики щиты вурайд тайман па актащта питас, ищиты кат кадаң кирас, лэдамтас. Ампиел па лув юпелна манас. Холмет пус манмадна па хоц велса, па нэмоса сытмал антам.

Ампиелна па юхы туса. Имел лавал: «Наң манэмна талты, асды питман щиты есащдан!» Ики лавал: «Анта, анта ма такали ант есащдам, вантлэн анты!»

Ат ол, хув антам ими юх тута ким этас, тохашсак вантал па, щиты ар кадаң сосыдыл. Ими юхы лоңемас па ики педа лавал: «Йийке, наң ким этлисан? Каман щикем ар кадаң сосыдыл, хойтав кадаңат ты йисат? Масаң тата ванна хатат лайсат?» Ики хаңкса талман таңкияд па лавал йийимел элты: «Каман щит мин кадаңламан сосыдылат». Ими лавал: «Наң халща вуям щи арат кадаңан?»

Щи эвалт ики ампие мутраяң олмал: щи ор хатат най парта еңитмал юпина ил питсат, аса мосна пайтсайт па щита щи парсат. Щитна кадаңдал атты ювман ампадна ики педа тусаят.

Щитна лавлат: «Сэңк неллаңци олта ант масл, щалитам масайн ищипа тапалдэн».

Ольга Тоболько толмащам монц



Хорат потардат

Охсар похална кадаңаң нэңхэт емаң хатл манас

Ай кер тылац 29-30-мет хатлданна Приуральской район Охсар похална кадаңаң нэңхэт емаң хатл манас. Алаң хатл собрание верса, манам тал верат пушци потарсат па мала алңиц верта питлат. Приуральской районна шоши мир нэңху – хут шёрс молтас, лув эвалтыдал касдыман яңхты нэңху холам шёрс еса антам, ловатлна 953 хаттэл. Район хуват яртъяңсот шёрс молтас кадаң савида.

«Мет алаңна кадаңат партонна понты, нёха маты, нявремат онттыды верат пушци потарсу.

Мет волаң вер, щит нявремат онттыда етсатэдна амыдал лайты таха педа ёхтаптата па сусн хонты онттыда тута маслат. Нявремат итта ар пелак тохлаң хапна тотлидайт, щитна сок ант вантлат. Талан па «Трэкол» яңхта питл.

Там пус кадаңаң нэңхэт емаң хатлна мет волаң касты хар верыдыса. Щит МУП «Паюта» кадаң нёха нёхарты Хон мув рекорд амтас, нэпекна хансам географической яс пас пилна «Ямал мувна верам кадаң нёха». Щи ораңна катсат ветъёң кадаң пиц нёха лэщатса, лув эвалтыдал 158 кг нёхрам нёха этас. Ловатлна хос нэңху кассат», – Приуральской район коща Иван Сакал лавас.

Приуральской район, щит ным мув, хата ишки кутна нэңхэт веритлат лув олапсэд савиман тайта, касдыман яңхта, худ велта, вай энмалта.

Касаң тал кадаң нэңхэт тамац мет волаң емаң хатлна актащита ат веритлат. Итта алңиц манты ёслал пайдытат ат манлат, кадаңдал ат энмалат.

Вера Лонгортова хансам потар



Хор: Вера Лонгортова

Газета

«ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1340 Заказ 0569

Подписные индексы:
на год – ПА700, на полугодие – ПР561

№ 14 (1213)

Газета вышла в свет 6 апреля 2024г.

Подписано в печать 4 апреля 2024г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»

Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

Генеральный

директор
АНО «Ямал-Медиа»
Зулинова
Марья Андреевна

Главный редактор

Яковлева
Алина
Кирилловна